

Noticia
Transparente
di Gobierno

ISLA ONLINE

Diabierna 26 April 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



PROME MINISTER

Evelyn Wever-Croes

Condecoracion Real 2024

18 CIUDADANO DI PAIS ARUBA A RICIBI UN CONDECORACION REAL PA NAN ESFUERSO Y DEDICACION BOLUNTARIO NA PAIS ARUBA

Diabierna 26 di april, un dia prome cu Dia di Rey, 18 ciudadano di pais Aruba a ricibi un Condecoracion di Rey Willem Alexander. E momento aki, ta conoci como Ocasion General, y ta relaciona cu e cumpleaños di Su Mahestad, Rey Willem-Alexander, cu ta esun cu ta otorga e condecoracion na e personanan cu a duna un contribucion special na e sociedad. Riba e mainta aki, 16 di e condecoradonan tabata presente pa ricibi nan Condecoracion Real di Gobernador di Aruba, señor Alfonso Boekhoudt, kende a splica dicon e personanan aki a bin na remarke pa un reconocimiento asina importante.



Prome Minister Evelyn Wever-Croes a splica cu ya pa algun aña, Gobierno ta poniendo mas publicidad na e tema importante aki, mirando cu na Aruba tin hopi hende cu ta haci un of mas trabou boluntario, banda di nan mesun trabou.

E personanan aki, ta esnan cu ta bin na remarke pa ricibi e Condecoracion Real, como gradecimento pa nan esfuerzo pa yuda boluntariamente:

‘Officier in de Orde van Oranje-Nassau’
Señora Nicole Lucia Maria Hoevertsz

‘Ridder in de Orde van Oranje-Nassau’:
Señor Hendrikus Antonio Eldemiro van Gaalen
Señor Ricardo Omar Gogorza
Señor Gerard Leendert van Vliet
Señora Annemarie Johanna van Vliet-Melchers

‘Lid in de Orde van Oranje-Nassau’:
Señor Ronald Paul van den Berg
Señor Hugh Drummond Connor
Señora Désirée Geneviève Croes

Señora Jeanette Violette Ivony Croes-Fingal
Señora Swinda Martha Claire Dumfries
Señora Martha Esmeralda Gomez-Winterdaal
Señora Mirtha Maria Cabrini de Haseth-Bislik
Señor Edgard Cristobal Kelkboom
Señora Wilma Valeria Kuiperi-Jansen
Señora Gertruida Margarita Lampe-Jansen
Señora Helena Carmen Maduro
Señor Robert Anthony Reeberg
Señor Dionisio Fecito Richardson

"Mi ta felicita tur e 18 ciudadanonan aki cu e reconocimiento importante aki, y gradici nan pa ta un persona ehemplar den nos sociedad. Tambe mi ta gradici tur esnan cu a wak e gran esfuerzo di e personanan aki, nominando nan pa e Condecoracion Real. Pa nos como mandatario di pais Aruba, e ta un honor y orguyo pa sa cu nos tin hendenan riba e isla aki, cu tin un curason grandi pa duna di nan mes, sin tin niun beneficio a cambio. P'esey mi ta pidi tur ciudadano pa sigui trece e nombrenan aki dilanti, pa asina tur esnan cu ta duna di nan mes pa yuda riba un base boluntario, ricibi nan merecido reconocimiento. Hopi danki y masha pabien", Prome Minister a expresa. ■■■



Prome Minister Evelyn Wever-Croes: PROME MINISTER A REUNI CU DOW RIBA PROYECTONAN ANDANDO

E aña aki Gobierno tin mas fondo disponibel pa asfalta



Diahuebs mainta 25 di april, Prome Minister Evelyn Wever-Croes a reuni na DOW cu e director y su ekipo di profesional riba diferente tema cu tin pendiente. DOW ta un departamento importante y crucial den desaroyo di pais Aruba den loke ta trata careteranan y planfacion.


Mirando cu e aña aki Gobierno tin mas fondo disponibel pa asfalta por mira tambe cu tin mas proyecto andando. Esaki ta bin cu su retonan, pasobra e capacidad na Aruba en general no ta asina grandi, y tin biaha un proyecto por keda pega, pero awo e retonan ey ta soluciona y ta bay continua cu e trabounan di asfalt rond di Aruba.

Na e momentonan aki e proyecto di reconstruccion di caminda di High Rise Hotel a inicia, y asina otronan lo sigui na e debido tempo. Tin diferente criterio cu ta wordo mira prome cu reparti e trabounan den e districtonan rond di Aruba. Ta mira e necesidad, e careteranan mas frecuente, esnan cu tin mas tempo wardando y ta mira cuanto cas tin den e vecindario.

Tambe durante e reunion a trata e tema importante di RWZI, no solamente e plantanan na Bubali, sino tambe RWZI Parkietenbos y RWZI Zeewijk. A papia riba e retonan cu tin cu esakinan y e importancia y e urgencia cu tin pa e privatisacion.

E ley ta na Parlamento awor aki y ta spera cu pronto por yega na privatisa e plantanan y asina esakinan lo bay den man di un compania estatal cual ta e compania Utilities. E compania estatal aki si tin e forza y e capacidad financiero pa haci e inversion necesario pa alivia e situacion actual.

E mandatario a indica cu ya den pasado Gobierno a purba di pone den e presupuesto 16 milyon florin pa inverti den RWZI, pero bou presion di e CAft (College Aruba financieel toezicht), Gobierno mester a kit'e debi na e situacion financiero di pais Aruba. "Pa evita esey ta bay privatisa e planta, y aki cu DOW nos ta haciendo tur preparacion. Aparte di esey tambe a papia di e desaroyo di pais Aruba en general y nos a toca tur e temanan importante y relevante unda DOW mester di sosten di Gobierno pa por cumpli cu nan", Prome Minister a expresa.





Fundacion Mi Voz Ta Bo Voz, Comision Nacional di Abuso Sexual di Mucha
y Gobierno di Aruba ta presenta:

Charla Conscientisacion y Prevencion di Abuso di Mucha

Speakers:

Drs. Melva Croes-Yanez | NeuroPsycholoog

Dr. Audrey Khan | Klinische Psycholoog

Sra. Magali Maduro | Directora Bureau Sostenemi

Sra. Omaira Britten | Poeta

7 pm - 9 pm

MFA SAVANETA | 30 april 2024

Nos muchanan Nos responsabilidad!



MINISTER ARENDS TA FELICITA BIBLIOTECA NACIONAL CU NAN EXITOSO SIMPOSIO DI AGRICULTURA SOSTENIBEL



Diahuebs 25 di april Minister Arends a atende e Sustainable Education Symposium cual e tema di e aña aki tabata "Ban Planta!". Un evento sumamente interesante elaborando ariba e importancia di fomenta un Aruba mas autosuficiente.

Durante e evento varios orador a hiba palabra, incluyendo Sra. Astrid Britten, Directora di Biblioteca Nacional, Sr. Rendell de Kort di Cornerstone Economics, Sra. Roselinde Barros di Living Soil Agro Consultancy y Sr. Gregory Fung-A-Fat di United Farmers. Cada uno a enfoca ariba diferente aspecto di plantamento, entre otro, sosten comunitario, cuminda local como parti di nos cultura, impacto ambiental y mucho mas. Hunto cu Santa Rosa a organisa algun charla di Sustainable Education Symposium den siman pa asina studiantenan tambe siña tocante sector primario na Aruba.

Aruba ta dependiente di importacion, cu ta haci nos isla vulnerabel na fluctuacionnan economico rond mundo. E tema di "Ban Planta" no ta solamente tocante agricultura pero ta representa un compromiso mas amplio pa aumenta resiliencia y siguridad di alimentacion di nos pais contra cambio climatico y incertidumbre economico.

"Cada simia planta ta un paso pa sigura nos futuro," Minister Arends a remarca, notando e importancia di combina sabiduria ancestral cu tecnologia moderno pa forma un caminda sostenibel pa Aruba.

Ministerio di Naturalesa ta felicita e ekipo di Biblioteca Nacional, Santa Rosa y tur e participantenan di e simposio pa nan contribucion den fomenta un cultura di agricultura sostenibel.





DIABERNA MERDIA MINISTER DI TURISMO Y SALUD PUBLICO SR. DANGUI ODUBER TAWATA INVITA NA UN CEREMONIA PRIVA DI FAMIA DI SRA. SWINDA DUMFRIES

Sra. Dumfries ta labora na JGZ, Directie Volksgezondheid Aruba (DVG) y awe a ricibi condecoracion for di Gobernador Alfonso Boekhoudt den nomber di Rey Willem Alexander pa su esfuerso y dedicacion boluntario na pais Aruba. En especial pa sra. Dumfries su trabou comunitario pa Aruba su muchanan y hobenan riba e tereno di salud. Minister Dangui Oduber a pasa expresa su gratitud pa e bunita trabou boluntario cu Sra. Dumfries a bin ta haci pa hopi aña.

Ta di remarka cu gobierno ta pone hopi importancia na e condecoracion aki, mirando cu Aruba tin hopi persona cu ta haci trabounan boluntario, banda di nan trabou principal y sigur ta pa gradicidi cada un di nan pa nan esfuerso y e trabou bunita di boluntad.

Minister Dangui Oduber ta felicita tur e 18 personanan cu a ricibi e reconocimiento awe y sigur kier gradici especialmente dos persona cu a ricibi lid in the orde van Oranje-Nassau : Sra. Swinda Martha Claire Dumfries y Sr. Señor Dionisio Fecito Richardson pa nan trabou den salud publico y pa nan reconocimento ehemplar den nos comunidad.

Finalmente, como Minister di Turismo y Salud Publico eta un honor pa reconoce y duna merecidamente hendenan asina cu ta pone nan curason y dedicacion di nan mes pa yuda otro den comunidad di Aruba.

Hopi danki pa e bunita trabou di curason.





Ministerio di Turismo y Salubridad Publico

FELIZ DIA DI

27 APRIL, 2024

Minister di Turismo y Salud Publico
Dangui Oduber



Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD